

Sindicato Simar:

Situacion Colegio San Nicolas ta 'alarmante y basta preocupante'

ORANJESTAD – Sindicato di Maestro di Aruba (Simar), a expresa su preocupacion pa e situacion cu tanto docentenan como studiantenan di Colegio San Nicolas ta pasando aden, a causa di e condicion deplorable y anti-higienico di nan edificio. Pero tambe pa motibo di inseguridad.

Ayera, presidente di Simar, Sheila Lazo-Tromp a declara na Bon Dia Aruba cu nan ta na altura di e situacion delicado aki. Pero nan ta lamenta cu nan a haya sa no via di un miembro of di e mesun docentenan, sino cu nan ta tende di e mayornan y alumnonan. Pero e ta kere cu e amor cu e maestronan mes tin pa nan trabou, cu nan ta haciendo hopi esfuerso y sacrificio.

Situacion preocupante

E ta haya un situacion 'alarmante y basta preocupante', mirando cu Colegio na San Nicolas tabata un sucursal of dependiente di Colegio na Oranjestad, y el a bira un scol riba su mes.

Den principio, Simar a tuma contacto indirecto cu e director actual di Colegio San Nicolas, pa nan ta mas na altura di e situacion. "Naturalmente Simar t'ey semper pa por brinda e docentenan aki, e oido y si por tambe, e caminda pa cana pa un solucion", el a bisa.

Simar y minister

Simar por compronde cu e preocupacion di e minister ta, na unda nan lo por aloca e muchanan aki, acaso cu mester cera e scol. Sra. Lazo-Tromp ta reconoce cu hopi aña e proceso aki a keda pega. El a bisa cu esaki ta e preocu-

pacion di Simar tambe, ya cu di otro banda no ta cuestion di djis cera un scol y laga tur mucha riba caya.

Presidente di Simar ta recorda cu ademá di Colegio San Nicolas, tin otro scolnan cu Simar ta bati porta di e mandatario pa wak con ta bay para cu e scolnan aki. E ta referi na esunnan cu a sali caba y cu ta wardando riba nan localidad, como esunnan cu ainda ta den nan localidad deteriora wardando nan turno.

Simar ta trahando cu e minister di Enseñansa pa wak con lihe e proceso aki por cana, pesar cu a sali un lista den corant di algun scol cu lo yega na vigor. "Nos ta puntra nos mes con lihe e scolnan aki lo yega na vigor pa un trabou. Tur esey ta preguntanan cu nos ta hiba na minister y mi por imagina mi mes cu su cabes ta yen cu tanto preguntan cu nos tin. Pero un caminda nos mester haya contesta", e ta bisa.

Scol no adecua

Como directiva di Simar, nan kier ta informa riba kico ta e situacion mes pa asina nan por a vocifera nan preocupacion tambe. Nan a papia cu docentenan di Colegio San Nicolas, pero e maestronan mes no a yega di vocifera nan mal contento cerca Simar. Bon Dia Aruba si ta na altura cu na comienso di e luna aki e docentenan a manda un carta pa minister di Enseñansa cu nan preocupacionnan y un lista largo di punto di atencion.

Sra. Lazo-Tromp a bisa cu Colegio San Nicolas a bira un Havo/VWO riba su mes, mientras cu e situacion di scol no ta esun adecua pa e tipo di enseñansa aki riba su



mes. Anteriormente e tabata un scol basico cu despues a haci uzo di localidadnan pa yuda Colegio Oranjestad.

Simar por compronde cu lokaalnan di practica no tin, manera mester ta pa un colegio. Loke tin ta cierto materialnan cu ta wordo uza no comparabel cu e nivel pa ehemplo di Colegio Oranjestad. E ta haya cu tanto na Oranjestad como na San Nicolas si un estudiante ta caba Havo, e mester tin e mesun nivel, y e mesun oportunidad pa practica lokaal e ta haya durante su curriculum. Esaki no ta e caso –según presidente di Simar– cual ta un preocupacion pa e studiantenan mes. Di otro banda Colegio San Nicolas a haya otro scol na banda cu nan ta uza e lokaalnan. Simar ta compronde cu e scol aki tabata cera pa hopi aña, y e condicion ta basta deplorable cu bestianan manera

djaca, cu no ta adecua pa nan por traha aden.

E sa cu e situacion di Colegio San Nicolas ta hopi dificil pa trata cu ne y mester pensa lo miho cu ta posibel. Nan ta un cuerpo di alrededor di 40 docente, unda tin un sala di maestro cu no ta carga ni 12 docente den dje. E ta un sitio importante unda e docentenan mester bin hunto y reuni y comparti cu otro, y actualmente e ta hopi dificil tambe. Esaki ta contribui pa situacion di e maestro ta uno di hopi stress tambe.

Sinembargo Simar ta mira cu e docentenan cu ta traha na Colegio San Nicolas ta purba di haci lo miho pa studiantenan cu e poco cu nan tin. Sra. Lazo-Tromp ta bisa cu e actitud aki ta di aplaudi. Pero nan ta keda traha den e situacion cu no ta esun ideal pa no perhudica e mucha,

lubidando riba nan mes y riba enseñansa di calidad den principio.

Inseguridad

Otro preocupacion cu Simar tin ta relaciona cu incidentenan di violencia cu a tuma luga den algun scol. Ta un asunto cu den pasado Simar a yega di vocifera caba su preocupacion sin cu ainda a bin un solucion satisfactorio. E ta un asunto complejo y no facil, segun sra. Lazo-Tromp.

E scol mester tin cierto protocolo, unda mester ta para con nan mester actua dependiendo di e situacion cu ta presenta. Pero pa logra esaki tur actornan mester ta para riba e mesun liña, no cu den un scol si y otro no, el a indica. E ta kere cu pa logra esaki nan mester sinta hunto y siki- era bin cu un forma basico pa cuminsa atende e situacion di violencia den scol. □